


文  
恭  
集  
一





集 恭 文

(一)

撰 宿 胡

# 御製題胡宿文恭集

久曾割裂得全難。四庫搜羅爲復完。是書亦散見永樂大典中。評詞臣採輯復成完本者。如此立朝有本末。可教遺帙聽彫殘。既經呈覽斯予事。自與發潛令彼安。通集原應俾鈔錄。至文乃合命鐫刊。教坊致語寧忠告。道院青詞實異端。胡宿文筆頗佳。允宜刊以傳世。第集中兼及道場青詞。殊乖正道。且代教坊致語。及爲內中侍御賀詞。則尤爲瑣狎。白當存其正者。刊行。全集鈔存可耳。去取之間繫旌瘴。示茲大略付儒官。

乾隆乙未仲春

# 文恭集目錄

## 卷一

賦五首

五言古詩十八首

七言古詩一首

## 卷二

五言律詩九十一首

## 卷三

五言律詩二十一首

七言律詩五十首

## 卷四

七言律詩七十六首

## 卷五

七言律詩二十七首

五言排律十九首

## 卷六

五言排律三十一首

五言絕句二首

七言絕句八首

卷七

奏議十八首

卷八

奏議九首

狀十一首

議二首

卷九

表十三首

卷十

表十九首

卷十一

表十五首

笏記五首

卷十二

外制三十二首

卷十三

外制四十二首

卷十四

外制九十五首

卷十五

外制四十六首

卷十六

外制二十六首

卷十七

外制四十八首

卷十八

外制七十一首

卷十九

外制五十三首

卷二十

外制四十二首

文 恭 集 目 錄

卷二十一

外制四十九首

卷二十二

內制十二首

卷二十三

內制十四首

卷二十四

內制三十一首

卷二十五

內制五十首

卷二十六

內制四十九首

卷二十七

內制九十首

卷二十八

帖子詞五十二首 上梁文三首

卷二十九

策問六首

頌銘二首

論辨二首

序贊三首

卷三十

書啓十首

卷三十一

書啓二十七首

卷三十二

書啓三十三首

卷三十三

書啓三十首

卷三十四

書啓二十九首

卷三十五



記九首

卷三十六

誌銘二首

卷三十七

誌銘三首

卷三十八

誌銘四首

卷三十九

碑表塔銘三首

卷四十

行狀二首

臣等謹案文恭集宋胡宿撰宿字武平常州晉陵人天聖二年進士歷官兩浙轉運使召修起居注知制誥由翰林學士拜樞密副使以太子少師致仕文恭其諡也事蹟詳宋史本傳宿立朝以廉直著歷事仁宗英宗多所獻納爲時名臣學問亦極該博當時文格未變尙沿四六駢偶之習而宿于是體尤工所爲朝廷大制作典重瞻麗上法六朝于韻語最長五七言律其波瀾壯闊而結響閑遠亦可直造盛唐闡闕

洵足雄視一時。迥出楊億、錢惟演諸人之上。宿集本七十卷。見于陳氏書錄解題。馬氏經籍攷。世間久無傳本。近人編北宋名賢小集。所輯僅寥寥數篇。厲鶚撰宋詩紀事。搜羅至博。而所錄宿詩。亦祇從志乘掇拾。皆未嘗得見全集。至金、元好問選唐詩鼓吹。誤編入宿詩二十餘首。說者遂以爲唐末爵里未詳之人。今攷好問所錄諸詩。大半在文恭集內。且其中有和朱況一首。其人爲胡氏之壻。與宿同籍常州。具見所撰李太夫人行狀。確鑿可據。好問乃不能攷證。舛錯至此。亦可知金元之間。其集已罕覯矣。今惟永樂大典分探入各韻下者。哀而錄之。計詩文一千四百餘首。雖未必盡合原目。而篇章較富。已可以什得其八九。旣繕錄全帙。編入四庫全書。復恪稟睿裁。刪其青詞、樂語、詭于正理者。定著爲四十卷。授之剞劂。俾藝林好古之士。復見完書。且千古共知彙訓昭垂。凡是非彰瘴之義。無不卽小見大。更足爲千古論文者。立之準則焉。乾隆四十年二月恭校上。

總纂官侍讀。臣紀昀。

侍讀。臣陸錫熊。

纂修官中書。臣徐步雲。

# 文恭集卷一

賦

宋 胡 宿 撰

## 正陽門賦

有宋受命。惟皇建國。獲九金之神鼎。應五精之火德。將以定九廟之攸居。彌萬世而不易。陋洛陽之如掌。纔可以備離宮。謂函谷之扼關。不足以創宸極。于是卽房心之廣野。據神明之華域。得天帝布政之廷。命司空度土之職。申畫郊圻。繕營宮室。建萬雉之都城。順五土之方色。王畿千里。侔日徑之傍開。君門九重。法天關之上闢。粵藝祖之創基。逮永熙之御歷。戰壘尙多。賓車未息。方且法神禹之卑宮。循姬文之旰食。重長府之仍貫。惜露臺之勞役。惟此應門。闕乎盛飾。屬三葉之承祚。配九皇而比迹。受萬玉之會朝。覽四海之圖籍。老上修懃。日際來格。風德周乎四面。言語重乎九譯。天業暉昌。國財厚積。通廣先猷。乃籲衆力。謂皇居之偪下。虧萬乘之尊嚴。謂寶儉之過中。非四方之表則。矧帝闈之峨峨。圖天象之奕奕。一開一闔。于以順乎陰陽。不壯不麗。何以威乎戎狄。于是申嚴戒告。條具章程。運松石于海岱。下杞梓于荆衡。瓌材畢至。美礎森呈。詔將作之利器。按堪輿之祕經。天老推策。石師督繩。晝則瞻乎陽景。夕則攷之極星。雲漢

昭回。正瑤光于神縣。山河表裏。裁寶勢于坤靈。築金椎兮堅重。置水滌兮端平。子來輸力。人謀獻能。千章兮俱度。萬斧兮並興。賦東山之悅使。造靈臺之樂成。挺庶物而首出。恍綠雲而上征。覆歷九軌。森倚萬楹。冠廣內以凝宇。標正陽而定名。寶篆鸞飛。耀煌煌之金刻。榮簷虬聳。壯翼翼之瑤京。峯兮天黨。屹若神行。麗譙橫互。磴道階升。雲梁布藻。煙瓦搖青。方疏洞開。璇題彪列。藹若鮮雲。蔽嬋娟之素月。鏤檻周施。彤欄鉤折。宛在半空。橫連蜺之雌霓。俯畢昂之中街。聳象魏之雙闕。觚稜上拂。隱日月之回環。輦道相過。瞰煙雲之明滅。綴以昆金。飾之和璧。塗腹澄鮮。榮光射激。離朱奪其目精。計然喪其心畫。形半起而還正。勢將翔而復抑。跂而望之。若太陽御六龍。升扶桑而耀色。迫而察之。若威鳳將九雛。下丹山而接翼。東虬兮西獸。交鎮兮左右。南箕兮北斗。夾照兮前後。赫赫壤以周布。岌飛廊而卻走。刻雕辰象。按宣夜之渾儀。圖狀神靈。選尙方之畫手。偃佺飛步。來曝于南榮。曼倩凝睛。下窺于朱牖。瑰譎萬態。于何不有。雄呖兮赫侈。磅礪兮穹崇。彈壓兮萬宇。冠映兮九宮。如衣服之有冕。譬鱗介之宗龍。配天之業兮。巍巍而蕩蕩。〔案〕此下似脫一句鬱鬱而蔥蔥。俯太行兮卻倚。瞰洪河兮注東。漢圖五嶽之形。儼存于宇下。周制九丘之地。悉布于檻中。是知帝者之有爲也。闡元極。稽邃古。述作表聖明之功。擬議成變化之序。宅中肯構。法太紫之圓方。大壯取模。用高曾之規矩。故能御六辯。總羣綱。安天下于置器。尊人主以如堂。鼓協氣而中出。導靈風而遠翔。納物于崇丘之富。躋民于壽域之康。樹闕中天。闡三正之教法。建瓴高屋。制萬國之侯王。若乃分至御辰。清寧祝吉。攷太史之宏議。酌觀臺之故實。命保章之職。仰以占乎五雲。詔師曁之官。中以吹乎六律。此所以

察義易之時變。助箕疇之陰騭。又若禮罷神壇。詔回天蹕。御百常之豐樓。端九章之華轍。肆楮案兮橫霞。植靈芝兮翳日。俯輪奐之神構。耀顛叩之聖質。樹子子之雞竿。降洋洋之龍綬。公告厥于帝嬖。敘祝飛于天乙。感人之樂。悅發于鈞霄。呼歲之聲。喧踰于少室。茲又恢一代之典禮。俾百王而祖述。大哉三光之所照。九賦之所均。有宮室以安體。有衣冠而正身。穆穆中夏。眈眈紫宸。功崇則業大。德盛則禮尊。斯干詠于周家。落成百堵。建章營于漢代。麗極千門。況乃業包海岳。道格乾坤。踰蒼姬之拓統。超金卯之集勳。撫和曠俗。惠養齊民。秋毫皆出帝力。率土莫非王臣。靈臺偃師。靡務先王之武。闔廬蔽雨。施及吾儕之人。故得中外畢力。大小懷欣。胥靡之工。驩趨乎版築。新塲之匠。投銜其風。斤役不愆。素事俱中。倫彼土階。載乎往牒。茅殿標乎舊文。或出墨家之瑣瑣。或主玉帶之云云。〔案〕或主。原本作或生。就文義。當是主字。帝明堂圖。今改正。繩以大中之法度。彼又齷齪而奚足論。若乃攷乎默定之理。剽諸故老之聞。正者所以建萬事之紀。陽者所以爲衆陰之君。鎮天安之路。寢壯帝宅之威神。豈人謀之經始。亦天意之冥存。蓋以恢久大之德業。崇燕謀于子孫。利正元亨。四德扶于君位。謳歌獄訟。萬年繫于天關。下臣委質盛期。棲蹤禁陌。睇闐闐之華峻。干青冥而烜赫。惕位貌之喧卑。悵威顏之疎隔。禁門引籍。非如司馬之朝臣。行在獻文。復愧甘泉之賦客。乃作系曰。煌煌特闡。明明哲后。樹華構兮無疆。建豐規兮可久。拂倚杵之寥廓。鎮方輿之博厚。拓基鞏固。將金狄以同堅。卜世脩長。配神樞而不朽者也。

### 建用皇極賦

在昔箕子贊于武王。演皇極建用之道。爲彝倫攸斂之綱。經以大猷。統九疇而克正。執乎至德。裕萬化而有常。故能立觀天之至教。爲經國之彝章。原夫立民必本于大中。治衆必由于至寡。既抱一以行矣。實用九之大者。體元立制。將舉正以適中。極深研幾。乃立常而化下。豈不以皇者保大之至。極者處中之規。建于民則國之寶也。藏諸用則神而化之。肇修乎八政之紀。上律乎五行之宜。酌剛柔動靜之方。裁成大本。樹正直平康之道。表正丕基。義用遵王。仁符守位。慎過差之咎。取中庸之治。立乎大法。爲百世不易之規。綜爾羣倫。協一統無偏之義。功歸乃聖。道格惟皇。協九功而時敘。體五始而化光。保合太和。克御旁行之道。綜制萬變。統歸中立之方。去彼異端。謹乎常憲。六極所以垂戒。五福由之致勸。既殊塗以同歸。由執一以應萬。亦同夫三辰上運。歸尊乎璇極之居。四氣旁流。取法于斗杓之建。無反無側。有猷有爲。處人上而欽若。正天下以宜其允。執厥中。仰稽古重華之訓。莫匪爾極。見思文后稷之詩。大矣上聖有爲。羣生作則。體風行而斯化。妙日用而不測。故能昭睿哲之元功。建中和之至極。

黃離元吉賦

黃居中而秉色。離含章而守柔。蹈至和而不競。統元吉以來求。粲兮有章。履文明之盛位。冲然處順。被謙益之鴻休。明兩之卦。聿陳黃離之象。斯得能居六二之位。遂配中央之色。有文在內。符聖人赫赫之明。守正于中。契君子溫溫之德。粲英華兮發外。迪清明兮在躬。安六爻而順守。執一德以內融。煥乃文章。發耀于重明之際。惡夫朱紫含華于正色之中。豈不以五采平分。黃者色之懿。八卦並列。離乃文之粹。觀一陰

之成象。統二美而居位。法之繼照。天光臻下濟之功。執以嚮明文德。有化成之利。蓋由體無剛壯。道有休明。乘初陽而不憂于患。履大中之克立。其誠故能主斯文于易象。配其色于土行。昭明之德內融。虛而不耀。和順之猷中積。動乃咸亨。然則柔而不害者。物之所應。剛而自用者。衆之所病。既章明之在御。又冲和而守正。故得百祥由是而告休。萬福以之而協慶。履乎中道。守一色以惟醇。乘乃至柔。配休光而爲盛。精義惟賾。聖文有爲。雖垂言于麗正。俾觀象而緝熙。黃裳之所謂在中。誠非遠爾。白賁之但能无咎。奚足方之。異哉美質無華。至虛攸保。成茲顯懿之德。由乃黃中之道。宜乎重華光表之君。爲法式而是寶。

蒙泉賦

稽易中之奧旨。見山下之出泉。養蒙之體斯在。善利之功未宣。靜之徐濟。藏用于濫觴之際。動而愈出。含滋于濟物之前。立言蓋自先聖。育德爰資上賢。原夫蒙之爲象兮。晦而未章。泉之爲性兮。導之斯出。將處順以待用。貴守蒙而不溢。況夫人事在養功未發之時。驗以物情。當習坎初來之日。發彼變盈之地。依乎藏疾之山。旣靈長之斯肇。豈利用以爲艱。守爾瀟淪。備潛德于一源之內。待夫疏導。致成功于萬派之間。柔以居之。漸而著也。涓兮之狀。初出。列彼之容。肇瀉。清而不撓。善淵之性。居中寂爾。含虛。鬻沸之容。在下莫潤乎水。受之以蒙。契木升于漸。允法井養之無窮。含德以居。蘊斯干之厚利。俟時而動。蓄上善之元功。則知蒙實俟時。泉惟立象。捨之則獨安于靜。用之則利有攸往。居乎善地。固不難于下流。洩爾靈源。信無踰于朽壤。豈不以蒙之道。貴守其正。物之用。亦存乎時。善下之動。未舉。守柔之道。攸宜。將萬物而浸彼。豈

一勺而取斯澄乎秩秩之原。至誠自守。譬彼存存之性。果行無虧。異夫湛爾中虛。淵兮下據。思混混以致用。竭涓涓而至著。儻加乎疏導之功。庶滄溟之可助。

顏子不貳過賦

偉顏子之賢哉。亞聖人之上才。既知過以無貳。益閑邪之不回。乘先覺以觀身。幾微必顯。敦至誠而適道。悔吝何來。原夫處陋巷以屢空。冠孔門而博雅。能盡去于貳過。將動由于純嘏。事有未善。但見乎先知之改。而後行。孰云乎不早辨也。然則過不可顯。貴乎內遷。貳不可長。防乎外宜。可離則且非乎道。有開則必辨其先。極深而研。在方寸欲萌之際。造形則悟。當細瑕未兆之前。守爾中庸。敦乎誠懇。去邪惟務。于得善。達節更聞于好學。稽仲尼之無大。所謂前知。攷子路之喜聞。誠爲後覺。莫不慎乎幽獨。戒在防虞。既度思而不亂。諒憂患以終無。自同乎禹稷之道。豈比夫師商之徒。苟知恥以方迴。是謂過矣。既表微而克正。其殆幾乎。則知善乃貴乎。則遷過實重乎。勿貳。自存淵默之境。不在彰聞之地。復爲德本。我則體復以終誠。幾者動微。我則研幾而繹志。故得改兮勿憚。去以無疑。蓋慎乎亂之生也。且殊乎人必知之。苟洗心而奉若。在滌覽以宜其未嘗復行。諒無憂于祇悔。不可則止。豈有患于小疵。彼視履考祥。退思補過。皆已成。而是改。非未睽。而能破。所以保中道之誠明。爲至聖之翼佐。

五言古詩



讀集

鬱陶倦煩暑。爽豁逢蕭辰。開樽有歡伯。傾坐得嘉賓。雕盤薦肥羜。寶刀鱠霜鱗。清談屏世務。善謔到天眞。須言燭可繼。莫訴盃行頻。至道諒在己。外物不關身。

雜興

嚴霜沾百草。不問菊與蘭。行觀秀色萎。坐使芳意殘。有酒聊自把。無萱良鮮懽。安得青精飯。爲駐顏如丹。

怨思

陰蟲思衰草。羈雌啼空林。盛秋授寒服。獨夜擣清砧。影孤隨月瘦。肌薄怯霜侵。平生託義分。夢想在容音。山頭憐化石。陌上重辭金。安得兩黃鵠。因之傳此心。

怨詩初調示龐主簿及鄧治中

我生豈不辰。貧賤亦偶然。讀書飯脫粟。差可樂餘年。藝麻室南端。種桑屋東偏。弱婦事紡績。丁男長力田。瓶儲苟不乏。安用三百廛。老翁飽食罷。日晏尙高眠。豈知天地間。陵谷有變遷。獨恨生苦晚。不在羲皇前。嘗聞父老言。醉鄉隔烽煙。安得盈觴酒。時復中聖賢。

碧樓

中條何峨峨。映我懸碧瓦。汾水望飛雲。參旂眺綠野。美哉山與河。河流疾于馬。

讀僧長吉詩

生民類能言。茲文特淵逸。精韞在希微。幽通資寫託。狀物無遺形。舒情有至樂。自非妙解機。誰抽神奧籥。大士棲綠巖。門前卽台嶽。翠屏何峨峨。千仞拂寥廓。芝朮被諸峯。煙霞興衆壑。中安仁智居。旁研華竺學。觀法識非空。了心無少著。人境旣相於。神明信超若。作詩三百篇。平淡猶古樂。于言雖未忘。在理已能覺。天質自然美。亦如和氏璞。貯之古錦囊。訪我杼山郭。杼山空崔嵬。然公久寂寞。中間三百年。寂寞無人作。何意正始音。緒餘在清角。山旁夏欲休。林英春稍落。吟登蒼卞餘。歸夢華頂數。駕言整巾瓶。仍前侶猿鶴。誰言雲無心。還依故山泊。王君玉送歸。有春風吹孤雲之句。願予禽鹿姿。繆此廢人爵。居常眩韶音。巖駭頓金絡。比將親椒蘭。端欲甘藜藿。緬懷淨名庵。終尋香火約。

池臺

層臺過夕娟。清池弄秋水。蟾明桂樹間。魚躍蓮葉底。如何惠莊津。乃在蒲城裏。

遠行

古有悲秋篇。遠行第三句。人情重辭家。客意倦長路。征馬陟前岡。栖鳥集喬樹。慘淡層陰生。號呼勁風怒。匣琴徒自攜。杯酒與誰遇。衣帶緩于前。衣香非復故。

遊颺

曼宇斗澄霽。池臺始登臨。幽芳無艷質。爽籟有真音。閒雲乍明滅。寒忽鷓浮沈。青山晴好望。白道細堪尋。疎蟬嘒急管。躍鯉應鳴琴。微風獵椒桂。快哉一披襟。

野廬

休舍松石間。外物不可必。一馬究微言。五禽治生術。仁智得所廬。吉祥來此室。

珍禽亭

仁人坐高齋。忘機宅真粹。魚鳥沐餘恩。樹石蒙善氣。珍哉島上禽。託身良得地。

靜齋

鈴閣侍衛稀。幕府文書省。石上試真茶。松間移小鼎。吏師所至清。仁者本便靜。

惜花亭

層陰養花天。亭樹多春色。午氣入衣香。東風吹酒力。瞻戀冶城遊。黃金良易得。

寄題齋館

東南有仙人。玉案經近侍。爲愛飛來峯。翻然下平地。白雲相與栖。絳雪居嘗餌。日作冷泉游。時尋徑山醉。徑山有五峯。參差標紫翠。西山玉芝巖。縹緲多雲氣。巖間名勝僧。除館待公至。施樹得榷楠。開軒對松桂。啼鳥傍簷楹。鳴泉落塔砌。蘇徑闢三條。籃輿時一詣。汲井試茶腴。援琴和松吹。榮啓老來歌。華胥午間睡。追隨支許遊。嘯詠羲皇治。武林賢主人。官儀斗樞貴。同是老成人。俱懷方外志。流水與斷塹。神交復心契。數幅倅山圖。三伏挂廳事。長謠紫芝曲。遠寄青霞意。他年狶赤霄。定搨浮丘袂。

題飲光亭

林風引石溜。席上清且寒。主人白羽扇。觴客水精盤。絃歌泛宮羽。酒面生波瀾。

送客

秋意不自適。況復登河梁。眷言送歸客。徙倚見斜陽。雜珮解席上。斑駁嘶路傍。風雲感素節。絃管思清商。菊殘餘老藥。蕙晚非新香。何以致叩叩。臨行持一觴。

邊思

勁氣初折膠。奔書聞插羽。寒金刁斗鳴。夕火兜鈴舉。霜威畫角雄。月思清笳苦。驃騎出慶兵。輕車前确虜。一鼓繫名王。三捷獻英主。天山掛雕弓。玉塞休強弩。龍領近封侯。華堂盛歌舞。

彭山贈貫之

彭山隔重湖。落日見孤塔。揚舲入空曠。煙樹散鵝鴨。山中老臞仙。萬頃織芥納。乘風落珠唾。暝色遠相答。平生爾汝分。磁鐵契已狎。萬緣一笑空。箇處無剩法。方舟過谷隱。風雨寒雲雲。黎明帶星歸。尙及齋鼓踏。臨歧戒後會。梅熟新秧插。期我散縑楮。莫忘鷗盟歎。

七言古詩

謝御書飛白扇子歌

聖皇多才復多藝。包犧徒云造書契。坦然制作侔日星。煥有文章賁天地。太宗飛白入于神。玉堂四字標

奇勢竇跼一學造其精。聖祖神孫知善繼。萬幾餘力表全能。三紀體仁成至治。金壺貯墨奉嚴禋。往年大  
揭明堂門。素龍鱗角儼欲舉。白鳳翹翼行將翻。八會遼邈不可見。六書細碎何足論。仁慈原廟多珍榜。河  
漢黼黻輝朝昏。天公常勅六丁謫。在在處處祥煙屯。邇英叨藉侍清切。浴蘭每歲逢佳節。蛟人海底織冰  
綃。宮工天上裁紈雪。彌綸寶篋已珍華。泛灑神毫益精絕。紛如薄霧翳靈芝。淡若輕雲拂初日。免令常侍  
登御牀。就降王人頒睿札。玉璽封題光姓名。孤臣拜手懼且榮。嗚炎扇喝昭慈眷。夙夜安民彰聖情。九門  
繞傳妙墨出。三殿已覺薰風生。標章有愧參鴻碩。視草無能裨聖明。短歌莫盡形容美。微志聊依頌嘆聲。



# 文恭集卷二

## 五言律詩

早春

煖沐陽和盛。蒼筤老色濃。大明消積雪。青靄遍諸峯。遠浪浮蘋鯉。驚雷起蟄龍。去年南去鴈。薊北又相逢。

津橋晚望

徙倚津橋上。蒼涼樹幄中。江雲數峯黑。山日半規紅。菖葉深依水。蘭苕迥得風。零壇春服就。歸思羨沂童。

井桐

一水清無底。雙桐碧有情。銀牀翻畫影。玉虎墮秋聲。露葉遊絲斷。風枝宿鳥驚。隔簾人不寐。又送月西傾。

春晚郊野

岸幘坐前楹。天圍極望青。月華開嶺霧。風影碎池星。重露驚棲鶴。幽叢帶暗螢。虛機心久息。寧待據梧暝。

舟次江口

香吹生蘭渚。飛霜下荻州。月波清浸夜。天幕冷垂秋。遠嶼迎潮沒。寒烟護水浮。櫂歌來澤畔。知是採菱舟。

賦江皋

目睇蘭皋上。春波泛早暉。畫船人競渡。繡羽雉交飛。鳥樹殘潮落。汀花宿霧稀。短亭迷酒市。官柳綠依依。

西郊二首

高樓十二曲。倚遍到斜暉。天幕清無翳。溪雲凍不飛。斷岡殘燒盡。遠樹宿禽歸。久憶蓮華社。鐘聲隔翠微。遠籟生寒野。平蕪弄夕陽。天寒空鳥道。水落見魚梁。島樹風仍舊。汀葭日映黃。津樓慵極目。杳杳白雲鄉。

慶雲寺檜

寶坊金布地。嘉木此含榮。吳帝留青蓋。湘神駐翠旌。月移香砌冷。風入夜琴清。若比東陽樹。婆娑意未平。

送臧寺丞赴建昌

新擢京司秩。初旌幕府賢。少年裁美錦。晝日撫鳴絃。山好當衙隙。雲閒至榻前。庭中無一事。時問岳僧禪。

送君爲從事東歸

秋半飭歸艎。輕橈入水鄉。吳歌聞子夜。陶菊見重陽。月浦鯢收浪。霜空鳥拂檣。南冠歸未得。潘鬢莫蒼浪。

送孫從事

三十一仙科。同時升大羅。軒翔幾人去。淪譎獨君何。淮桂牽吟數。湘蘭寄恨多。且欣彈頰弁。榮路未蹉跎。

送王從事赴漳州

再奉天官集。初登郡將筵。檄材磨盾妙。賓履躡珠賢。舊洞毛生竹。新池水映蓮。幕中多暇日。曳彩戲親前。



禁直晨興呈承旨侍郎

內殿已攢點。禁中漏盡。謂之攢點。攢衣朝未央。月低銜禁樹。雲薄護朝霜。欲放魚文鑰。先含雞舌香。大昕鷄與鷲。奏事向明光。

館中候馬

紫陌歸鞍後。端門午鼓餘。銅池銜落景。鐵櫃掩殘書。水遠溝聲細。花閒壁影疎。去驕呼已遠。自笑守應廬。  
[案]應廬二字未詳所本。宿又有上小謝學士啓云。更直應廬。當是指祕閣直舍而言。

近郊

信馬斗城外。芳郊秋物多。丹楓驚歲晏。華黍喜時和。野老醉相話。牧童閒自歌。牛羊稍覺晚。一一下層坡。

沙鳥

一啄樊籠外。蕭然烟水鄉。折蘆翻夕夢。急雨亂秋行。南澗漁波淺。西風菰米香。世無塵詰手。誰與入清防。

歲除

守歲薰爐永。迎年煦律回。仙人收臘去。木帝送春來。桂伴陰蟾隱。梅衝艷雪開。平明喧壽譙。柏葉奉懷杯。

鸚鵡杯

介族生螭蚌。杯形肖隴禽。曾經良匠手。見愛主人心。置在金樽側。來從珠水潯。陸機。薦戴若思曰。明珠大貝。生于江壘之潯。

願爲仁者壽。再拜莫辭深。

上苑

漢籟春來早。光風近太清。花深迷玉漏。霧遠失金莖。夾道青松密。周阿碧樹生。回瞻蔥鬱氣。遙覆九重城。

山中

乘秋尋遠壑。偶到幽人家。濁醪釀秫米。香飯炊胡麻。微徑捫蘿葛。高峯弄雲霞。餐和殆忘返。落景半規斜。

東溪早步

宿雨澄粉幕。高霞冠遠岑。青蓮護水色。翠竹結村陰。雪浪魚跳藻。風簧鳥嘯林。峭帆天未起。撩動五湖心。

水館

略約橫雲島。欄干瞰玉淵。雨汀翹睡鷺。風樹咽嘶蟬。綠髮莓苔地。紅衣菡萏天。夜涼三弄笛。月在釣魚船。

送徐晉卿東歸

夜來龍具冷。有客厭長安。去國朝衣縑。還家楚葉丹。雪情欺酒薄。月思拂琴寒。只待東風起。林鶯振美翰。

送旌德田宰

錦邑罷鳴琴。歸塗指上林。柳鞭饒醉折。山館勝遊吟。清譽時苗犢。離悰望帝禽。明庭趨覲日。優績簡宸襟。

招公儀小飲

官舍隱非隱。仕途才不才。棟閒秋燕去。籬靜晚花開。卓甕何妨臥。莊軒或自來。求羊疎我甚。三徑有青苔。

朱鳥航

浮航二十四。一一跨淮中。此地名朱鳥。當年踏彩虹。香塵迷舊路。寒水蕩遙空。日暮驚飛蓋。翩翩下渚鴻。

余山人居

一室閉春林。蕭然物外心。碁聲敲月重。屐齒印苔深。竹閣茶烟細。山園鍛樹陰。會當逃世網。來此締朋簪。

和人山居

翠柏蔭山莊。巖扃四序涼。歌攀牛角遠。嘯引鳳音長。夕膳烹葵熟。春杯切桂香。列侯生計在。千戶橘含霜。

山居

松韻笙竽徑。雲容水墨天。人行春色裏。鶯語落花邊。脩竹三間屋。清泉二頃田。了無官府事。雞犬莫登仙。

經朱氏郊居

東岡接釣磯。有客偃郊扉。繞舍喧流水。當牕識翠微。溪田香稔熟。霜樹晚桃稀。半日揮塵袂。停車不記歸。

送外表王植赴官嶺外

五嶺知何許。離懷豈易言。傳情無去鴈。驚夢有啼猿。溪思吳萼老。別墅在梁溪林香越槿繁。渠渠持美酒。計日望歸軒。

銀臺退朝

官事良爲少。人生初得閒。長吟聊擁鼻。薄酒且酡顏。春物行將晏。年芳尙可攀。此心同木鴈。材與不材間。

桃葉渡

恨望情人曲。空留此渡名。一條衣帶水。千古石頭城。艷歇雙桃色。歌沈兩槩聲。不堪懷古意。山外夕陽明。

春寒

三楚多寒地。憑山復大川。龍鱗橫雪隔。羊角起風天。酒價高平日。花期晚去年。白門無限柳。疎瘦未成眠。

蓬萊詞

瀛閩盛佳招。排雲下赤霄。水犀梳插髮。火玉佩垂腰。鳧影朝青鳥。鸞音咽紫簫。蓬宮無夜色。豹髓未嘗燒。

寄合肥知己

離管回香轡。行舟動翠篙。夕魂惟是黯。春日旋成蒿。夢與楊花蕩。書憑燕子高。望中人不見。湖上首重搔。

題蘭溪

招提紫翠中。僧住最高峯。幾劫親諸佛。三生聽此鐘。早香依澗樹。高臘寄庭松。性海無窮願。金書字字濃。

師造大悲像。著發願文。

景福殿緋桃

儉約蓬山客。閒尋芳樹蹊。晨葩鮮欲語。春色醉成迷。豔奪朝霞段。香傳冰麝臍。飄然凡境外。初有乳鸞啼。

暑夕水亭

曲檻瞰回塘。披襟對羽觴。蘋風微有韻。水月自成涼。嫩篠疎疎影。新荷偃偃香。么絃聊按撫。志不在滄浪。

新荷

一夜抽輕蓋。平明映曲池。水涼魚未覺。烟淨鳥先窺。露重心猶卷。風多柄尙危。東林應結社。祇待素華披。

惜花

試步向欄干。奇花正好看。乾坤增著力。風雨莫無端。彩筆題詩易。金刀下翦難。十分方吐半。猶喜夜來寒。

晴虹

霽野收雲雨。長光架一條。媧天初補石。乾鵠早成橋。日馭迷黃道。仙梯接絳霄。誰能乘六氣。萬里信扶搖。

邑宰惠花木

曉圃分花品。煙耨手自攜。未貪桃結實。且映李成蹊。瞥見香蜂集。仍聞好鳥啼。河陽春色晚。流過短牆西。

行次淮上寄何慈秀才

南浦傷離數。西州作惡頻。吟亭蟬送柳。宿枕鳥驚晨。鄰會疎沈李。吳懷豫憶尊。此心何用慰。前有杏園春。

秦淮

厭勝踰千載。祖龍安在哉。寒潮平復落。幽鳥去還來。龍鑿功全異。牛山事可哀。不知終古恨。誰見劫成灰。

重陽日東園

沆瀣催時律。幽陰結夕霏。樓臺侵日上。山水送秋歸。海燕辭巢盡。霜鴻避弋飛。一杯元亮酒。聊以浣塵機。

宿白佛寺

下馬憩禪關。春苔一徑斑。歸雲尋谷口。倦鳥泊林間。山客收茶罷。龜僧數息閒。月高人不寐。隔嶺水潺潺。

甘露寺

寶勢窮吳地。寒流對楚邦。一峯擎佛刹。萬象入僧牕。落日銜遙樹。晴虹畫半江。海門秋色近。翠朵自成雙。

自詠

索米年來甚。伶俜祇自知。黑貂隨日敝。葆髮豫秋衰。舊產思重理。先賢恥逆施。呂虔刀未解。骨法護多奇。

華陽逋客

小隱華陽客。山中不記年。酒中長有聖。葦下更無仙。授得廣陵散。注成秋水篇。吾纓今未濯。慚愧舊林泉。

瓦官寺

紫色嘗開國。金輝此界繩。火輪經壞劫。雪頂見殘僧。狂薜緣秋壁。深松映晚燈。哀猿不可聽。一一在巖藤。

題劉奉禮書齋

人向西齋學。家承北第榮。錦囊添句重。蟾滴試毫輕。底法成新構。開書泣舊楹。丹山消息斷。喜見鳳雛聲。

和吉老學士召赴崇政殿試舉人

需宴經芳已。嚴趨奉禁宸。子亭參覆試。止聳奉周詢。詔譚果幸  
泛覽試卷玉取三燒粹。金求百汰真。自慚諸老意。

多賴洛陽人

清明日謝人送酒

寂寞揚雄宅。鴟夷載酒家。鑽榆試春火。切桂暖晨杯。芳藥何須菊。香梢尙有梅。自慚非叔夜。聊學玉山頽。

金山寺

寶勢中流起。香園此布金。鷓棲金殿冷。龍伏夜潭深。水鳥銜生食。江神聽梵音。上方聊送目。天幕杳森陰。

齊國大長公主輓詞

舊築王姬館。新開貴主阡。山林經駐蹕。烟霧隔飛軒。天屬尊惟孝。邦風穆以賢。鸞龍攜翰藻。昭德萬斯年。

兵部尙書贈司空侍中晏元獻公輓詞三首

俊老三階後。高華四紀中。朝廷用文治。廊廟得才雄。雞樹前陰改。鱣庭舊跡空。生存華屋處。零落恨無窮。

川嶽淪精氣。風華喪傑才。典刑留大雅。文象圻中台。聚窟香難破。鈞天夢不回。只應之帝所。鳴玉侍丹臺。

公早被章  
聖顯遇。

儲極元寮寵。公貂盛策班。寧神依大駟。結冢近陘山。鼓吹春風裏。麒麟夕照間。寄言川上水。何事不西還。

太尉文肅鄭公輓詞三首

西北謀元帥。東南出雋儒。上前曾借筇。闔外復投壺。見器同安國。憂邊得亞夫。如何遡黃壤。不及播洪爐。

公業關東望。夷吾天下才。辭鋒橫劍戟。詩筆走風雷。帥節行邊去。氏酋獻地來。榮華一朝盡。埋玉使人哀。

將鉞徵聯重。公槐賁典加。哀榮班襚袞。虧痛軫投瓜。朝露沾崇旆。秋風咽迴笳。英靈不可問。宰樹有棲鴉。

太尉侍中鄭國宋公輓詞三首

第一平津策。同時入洛名。配台升上相。宰漢得元精。國念靈龜喪。人嗟厚棟傾。容篇傷俊老。殊禮極哀榮。盛業元根古。高文早變風。墮鱣遺館在。浴鳳舊池空。卓馬辭丹陛。公以使相。還節。三公。薨第。騎箕向碧穹。琴竽三月罷。鄭國愴賢公。

天上三台坼。人間一鑑亡。寧神韓土內。結冢隴山傍。槐鼎厥儀物。貂蟬秘密章。高賢同委化。茲理昧蒼蒼。  
座主贈司徒待中宣獻公輓詞五首

天下中庸德。人倫正始風。立朝周鼎重。當代禹門崇。注意深黃閣。收神杳碧嶽。蒼生終古恨。尺璧在丘中。三陟贊樞鈞。殲良昧上旻。幾傳分相史。終未立家臣。衛武徒虛語。巫咸不可詢。空餘山甫德。流詠在蒸民。門盛三鱣講。書追兩馬修。朝評尊月旦。王法正春秋。革履聲長絕。緇衣詠獨留。從今非大醉。不復過西州。鳳德衰何早。蛇年讖有開。斂衣班上袞。愍册責中台。綠鵠空存飾。騎箕不下來。棟隆今已折。僑壓可勝哀。鹵簿指西州。都人助緇謳。白雞亡謝傅。黃石葬留侯。霧薄旌銘慘。風長騎吹愁。神華何處所。流恨滿山丘。

禮部蔣侍郎輓詞五首

大雅時之老。高陽世有才。英名知四海。公議許三台。華皓辭歸去。蒼黔望起來。一朝嵩構毀。愍册感餘哀。香案經爲吏。甘泉預侍晨。衣冠親雉尾。章疏動龍鱗。當世高人物。諸公滿搢紳。忽聞捐几杖。萬恨只酸辛。潁水重臨久。公再領吳郡。桐鄉見愛深。峴碑偏墮淚。鄭瑟盡停音。蜀士知鄒學。吳兒喜洛吟。公在蜀。在吳。留意學校。精于多傳誦。生前祠影在。寒霧碧山岑。



尺璧丘中恨。人間第一流。九原迷白日。萬壑怨清秋。風月高情盡。煙霞麗思休。故時芝館在。迢遞使人愁。  
茂苑來書跡。藍橋別淚痕。如何一交臂。不覺九招魂。東里嗟遺愛。西州哭舊恩。二孤猶在卯。未免懟乾坤。

翰林南陽葉公輓詞三首

方丈仙山地。承明帝所人。辭源長萬里。筆力重千鈞。草詔風雷暮。賡歌律呂春。如何巖雨望。奄忽棄生民。  
獻替依明主。周旋奉至公。直尋無枉道。方寸有孤忠。恥在瓶罍罄。嗟深杼軸空。蒼生猶未泰。夫子已先窮。  
遠策思開濟。孤飛易中傷。中途捨駢驥。少日鑿鸞鳳。千鎮仍雙折。臯夔遂兩亡。公與故太尉鄭公。爲其落。同時葬于吳下。逆之友。不數月相繼。莫子實被二公獎贈。吾生知己矣。魂斷武丘傍。

題飲光亭

居易能藏氣。探幽復治亭。泉華聊自挹。澗響與誰聽。圓檜行依葢。前峯坐對屏。一瓢吾道在。涼月此忘形。

晨起馬上口占

馬過津橋外。城臨金斗傍。金斗。肥城之名。早霜濃著瓦。落月半銜牆。暗水澄寒底。初霞漏曉光。疎鐘林下寺。煙景正蒼涼。

九月十五夜北樓望太湖

雲影消空闊。霜華拂杳冥。秋光不隱膈。夜色欲迷螢。爽氣橫蒼下。涼波接洞庭。水仙當此夕。應化白龍形。

登潤州城

城壁起山根。樓梯易黯魂。雄風搖碧浸。畫角弔黃昏。一帶分江紀。雙峯點海門。東方瞻宰樹。秋色暝前村。  
懷宣城會勝院二首

淨刹枕城隅。溪光清且虛。僧閒對馴鴿。客至數游魚。巖氣浮川上。林香生雨餘。南雲雖可望。長與沃洲疎。  
城外尋僧遠。居常信馬蹄。移時取香飯。半日濯靈溪。白馬迎人下。清猿對客啼。亭前有封殖。試爲問紅梨。  
沃洲亭前有梨樹。玉溪生有崇文館紅梨之句。

仲春三衢道中

隔閏年芳早。天風泛暖暉。酒香迎社重。村語向蠶稀。林際新鶯出。楹間故燕歸。湖頭春在否。人去柳花飛。  
贈少室王山人

九籀祕仙經。巖巖玉骨靈。內書天上見。仙樂帝前聽。壺小藏仙界。槎高拂斗星。華陽陪夜話。多是說金庭。  
送錢比部守盛山

家世稔書在。山河廟券存。烏衣出才子。朱轂滯王孫。過峽朝雲舉。辭梁臘霰翻。遙知巴子國。愛日有餘溫。  
聞鶯

雙翎何睨睨。百囀更綿蠻。獨向芳林宿。多衝細雨還。低迷穿柳外。調笑入花間。肯比青鸚鵡。雕籠受閉關。  
送顯忠上人歸吳郡

秋風隨處起。振錫不留行。卻背嵩雲去。迎看淮月生。禪通少林默。詩得杼山清。幾夕巖窗下。忘眠聽瀑聲。

# 文恭集卷三

## 五言律詩

### 芳茂山

此地橫青嶂。當年聳紫氛。晉時常有紫氣現。碧花巖下柰。玉葉嶺邊雲。寶勢三神秀。靈風百草薰。將軍精爽在。可解勦移文。晉將軍曹橫葬此。

### 浮石寺

溪碧照浮航。仁祠紫界牆。牕扉衝遠色。樹石納餘涼。升講林花落。拋生水鳥翔。逢僧談止觀。數刻盡牛香。〔案〕牛香二字。不經見。法苑珠林。有云。牛頭之香。生于海岸。此殆節用之。

### 送張著作任柘城

出宰分寰邑。修書得祕丘。青雲莫厭晚。翠柏最宜秋。舊學緇林散。前驩醉墨留。弦歌聊自慰。不足論全牛。

### 別墅園池

小池連曲圃。幽可滌煩襟。露菊凝秋艷。風荷結晚陰。碧蘆巢鳥重。青藻宅魚深。自是輪蹄外。翳塵豈易侵。

送曹生歸臨江別墅

氣入商中勁。人思濱上勞。滄江縈故國。涼月伴歸舫。麗賦憑烏有。清篇託畔牢。〔案〕畔牢二字。不經見。漢書揚雄傳有云。書名畔牢愁。此殆節用之。竹林溫緒業。天穀佇時髦。

寄善慧大師禪齋

金策巡方罷。齋軒俯斗城。池閒魚聽法。臺靜鳥窺生。社影香蕖白。禪陰碧柰清。昆灰多妙辨。〔案〕昆灰二字。不經見。當即是昆明劫。灰語。節用之。平日集朝纓。

小閣

小閣閉春風。疎簾隔幾重。柳絲收未住。酒病太無惊。帶眼偏知瘦。葦圖最信慵。隆中一覺睡。日影過高春。

悼往

昨夜西樓月。團圓似去年。鳳屏非復舊。虎枕未成眠。破恨憑湘酎。〔案〕湘酎。原本作相酎。有酌。湘吳之醇。酎。句。致謝惠遠用之。今改正。流哀寄蜀絃。葛華與參宿。〔案〕葛華二字。不經見。攷梁樂府前溪歌。此蓋節用其語。此見恐無緣。

江樓

亭亭紫桂樓。渺渺白蘋洲。易斷傷春日。難銷假日憂。雙鳧仙子貴。兩槳美人愁。欲寄青泥訊。雲峯隔舊遊。

初赴楊子任

補吏承人乏。安貧得士常。半輪朝受命。數舍宿春糧。自蘭陵抵儀真。數舍而近。楚地元三戶。騶奴亦一囊。空裁宣德頌。何路奏明光。

### 徐偃王廟

天下慢朝周。君王瑤水流。一朝規問鼎。千里御還驄。故國無歸日。叢祠幾換秋。洗洗耳孫慶。惟烈在仁柔。  
邑人率多姓徐。云其苗裔。

### 清溪泛舟

家在清溪上。乘閒一棹歌。夕涼天有月。秋迥水無波。鷗鳥機心斷。鯪魚香味多。吾纓猶未濯。終是負漁蓑。  
一年好景

### 早鴈

樽俎真無奈。風騷亦被魔。酒龍春力健。詩將夜謀多。未羨封侯印。偏憐卻日戈。寄言榆叔夜。休惜玉嵯峨。  
關樹來時紫。江楓到日丹。驚弦初月上。避弋太虛寬。野水涵秋色。霜雲結夜寒。終年南北路。未可笑離鸞。

### 寄懷尊師

〔案〕尊師上。似有脫文。

多年疎法集。長夏憶齋房。桐雨生苔淨。杉風坐石涼。眞茶烹潤溜。滿飯取天香。何日揮冠冕。相期作道場。  
華陽道士朱尊師

閩苑花邊醉。知君是謫仙。姓名金簡上。官職玉臺前。碧海三奇藥。青梯尺五天。祇愁騰踏去。相望隔芝田。

紫薔薇

天上星垣貴。人間花品高。偷模煩象管。學剪費金刀。西母停雲輦。東卿駐節旄。曉軒無限思。香架近蒲桃。

晨入都省聞子奇內翰宿太常因寄口號

相思禁林客。知奉太常齋。月落桐依井。風休絮滿塔。歡娛疎勝集。申寫寄長懷。遙望牆東隱。朋簪杳未諧。

又陪公素舍人晨入西閣見紫薇初開

疎雨休前檻。新英艷小叢。且欣當夏日。不用憶春風。便可攜歡伯。相從作醉翁。回頭問塔藥。何處覓蔦紅。

題攝芳亭

有客隱東岡。珍亭號攝芳。仙壺分氣象。木帝借風光。淥水穿林遠。朱橋跨岸長。寶隣曾折桂。今是狀元坊。

攝芳主人。乃今副閣徐公之里閭也。

初秋

九夏困煩冤。逢秋似得仙。短牀便月下。長簟怯風前。露氣清羣木。雲稜澹一天。西江無限水。長嘯憶樓船。

七言律詩

大慶殿元會

殿裏爐香散彩雲。殿前旌仗從朝暾。后夔六樂調時律。太皞千春入御樽。神化還隨蒼震始。天顏卻映少

陽溫新年喜氣知多少。鬱鬱葱葱覆九門。

燕洞宮

洞裏青娥赤玉簫。香童迎過百花橋。身輕不待冷風馭。天隔難逢翠羽翹。仙醴四升誰酩酊。使鳥三足自飄飄。座中若話金庭事。記取真人是子喬。

張侍讀箋注太玄經義

陳書覆瓿久無憐。天幸名儒釋舊爻。準易一時遭客難。賞心千載獲神交。高情要在崇孤學。餘力猶能解衆嘲。誰道鳳凰難得髓。續絃今日見靈膠。

賞花釣魚應制

球檻靈芳濯露開。瑤津朱鮪復新來。三竿御水承垂釣。萬藥晨葩奉賜杯。春暖僊萸初霍靡。日斜芝蓋尙徘徊。柏梁聖作星躔麗。累氣蕪音愧仰陪。

咏蟬

柳條高處不須吟。正是螳螂負異心。已斷清腸悲玉露。更流哀響入瑤琴。長洲苑下風聲急。宣曲宮中暮色深。莫道齊姬無伴侶。海邊精衛亦冤禽。

登雄州視遠亭

誰將粉水掃天衢。萬里全開晦景圖。百尺凍雲飛未起。一筇寒鴈遠相呼。由來封略非三代。大抵漁樵似

五湖欲望繁臺何處是。繁臺不見見平蕪。子家在京城東南。繁臺之下。繁音婆。

送錢子文著作宰福陽

三政平反有惠心。民歌遙望邑中黔。桃翻浪影吳艎急。芸掩書香漢閣深。行訪名山須著屐。坐清羣俗且橫琴。西州有客偏傷別。無密瑤華寄好音。

題承詔亭

開徑臨江有舊居。野亭于此狎禽魚。八才素擅高陽里。五返曾迂使者車。圯上早傳黃石略。隆中難戀武侯廬。主人今醉葡萄酒。籬下秋風菊自疏。

送清漳護戎王中立

賦別忽忽涕泫然。七閩封堠接蠻煙。山長水遠知何處。花落鶯啼又幾年。願我青衫隨吏牒。惜兄華髮事戎旂。風波世路相逢少。腸斷東歸下瀨船。

送呂昭鄰同年宰巫陽

清藥君宜妙一臺。當年仙桂竝枝開。樓逢春雪嘗爲曲。廟近朝雲轉費才。遠字莫教雙鯉斷。歸期偏望二鳧來。巴猿蜀魄多離恨。猶喜圭田助酒材。

送李寺丞宰攸溪

短李祠堂世闕餘。少年從學馬融居。樓中質問無疑義。帳後傳藏有默書。茂苑卻尋花氣歇。家山重上桂



陰疏弦歌莫嘆浮湘遠。纔是青雲舉足初。

寄題黃氏閒宴閣

一聲飛迢遞拂秋槎。宴坐塵清道有芽。五葉對僧談妙果。一槍留客試真茶。簷前喜景沈歸鳥。牕外晨暉泛早霞。衍篋文多休寄傲。月間芳桂正窅窳。

和遼卿館中晚入〔案〕遼卿。原本誤作遼卿。致宿他詩作遼卿。又

銅狄嚴扉大帝家。兩回天氣湛春華。牆頭落景半規日。樓外餘暉幾疊霞。風近天淵聞鬪鴨。煙開宮樹見棲鴉。端門漏密長廊靜。時見香英墜砌花。

朝罷

朝罷通中一覺眠。右銀臺路入西垣。日長曷覺芝泥熱。風軟頻驚藥樹翻。朱檻帶陰難可倚。紫薇當晝不勝繁。何須更寄陶臆傲。自有餘涼在此軒。

送梅監丞宰山陰

春半朱航拂水輕。季珪佳邑得時英。民淳定見蹊田默。歲稔仍占射的明。太史舊遊書穴選。右軍殘跡墨池平。何妨公外尋僧社。琴鶴相隨雅有情。

送集賢李學士赴荆臺

蓬島迴風此再來。當年俱重輯寧才。芝隨禁掖新泥熟。桃應仙源舊路開。金契旋聞臨外闔。雲屏仍是接

中台時丞相大學士兼領書殿之職專城四十前賢事。期歲行歸妙一臺。

子莊見求近詩以一闕爲介

半綸祇役謝英遊。牒訴裝懷思若抽。銅鉢任敲何所得。鐵孟雖缺豈銷憂。楚囚操樂寧忘本。蜀客擠辭祗傍愁。強挾巴音還首鼠。知君詩戶敵千侯。

送張從事

月毫揮檄愈頭風。屈佐初賓位未充。金玉擅珍須席上。蛟龍爲物起池中。叢雲絢彩人歌舜。綿竹攜辭客薦雄。一乘追鋒看賜對。虎賁千戟照瓊宮。

山居

老矣求田魚稻鄉。兒孫常要在余旁。提籃買菜須靈照。舉案齊眉只孟光。醫國有方三折臂。扣關無路九回腸。紫芝白髮秋風裏。悵望商山綺與黃。

寄子高秦州從事

雪裏詩筒至自秦。仲宣佳句樂從軍。谷鶯漸喜遷高處。塞鴈猶嗟失故羣。北闕舊遊孤似月。西州迴望遠如雲。一枝春色無由寄。手弄梅花卻自薰。

和曼卿館中夜直

右銀臺路逼僊盤。有客通中此宿官。鈞奏暗驚天上近。霞杯難制月邊寒。風來禁樹龍傳點。露下高梧鳳

戢翰更聽建章魚鱗動水蒼朝珮響珊瑚

遠思

一片平蕪百尺樓。闌干橫絕點清秋。三年字與燕鴻斷。千里心隨桂水流。空對霜葭驚遠別。忍題雲葉寄牢愁。驪駒不見西曠迫。目眩天涯片席收。

和遂卿寒直

子門肅唱徹周廬。甲夜輕寒臘破初。樹底劬飛還類鵲。齋中酣夢欲成魚。三鍾賦粟才無取。五餌干時策已疎。天祿舊來名寂寞。更堪牕雪照殘書。

九日山陽驛作

飄泊年來憩下亭。雀羅秋靜掩苔扃。拂牕紅葉欺閒臥。倚檻黃花笑獨醒。盛憶林泉羞白石。欲持香火訪丹經。華陽小隱平生願。可分區區事挈瓶。

趙宗道歸輦下

泫牒相逢楚水湄。竹林文酒此攀嵇。半氈未暖還傷別。一臂初交未解攜。江浦嘔啞風送櫂。河橋勃窣柳垂隄。明年四月秦關到。洗眼揚州看馬蹄。

送天章王待制再領陝州

愛樹重攀隔十春。召南遺俗至今淳。車邊野鹿依明府。鄭洪行春。有白鹿夾轂。池上沙鷗識主人。園池之勝。甲于雍部。太

華遠峯捫日馭。洪河高派落天津。壺漿竹馬參歌舞。頓覺城中喜氣新。

咏鶴

獨立青田刷羽儀。朱研丹頂雪裁衣。賦來自合凌清漢。仙去何曾識令威。松蓋露寒應有恨。蓬山雲斷未成歸。舊巢寄在三珠樹。待與還丹作使飛。

舊將

會上燕然勒漢兵。白頭麟閣見儀形。三朝自是山西將。百戰曾焚老上廷。已奉列侯歸北第。更籌深策破先零。〔案〕先零。見漢書趙充國傳。西羌先零注。鄭氏曰。先零。零音憐。無作陵音者。此入九青韻。蓋失攷。彎弓擊劍平生事。不許兒孫授一經。

七夕

孔雀南來燕子西。銀河消息已驚遲。石城仙使飛三足。玉殿華燈焰九枝。暫揜星機同一笑。卻披雲幄重相離。杞天長在年梭疾。若比人間是遠期。

宛陵秋晚

誰道江南好物華。江南今日抵天涯。秋風只解吹桐葉。暮雨還來打菊花。寒水答砧偏響亮。迴樓飄角更嗚啞。舉頭試作長安望。惆悵青山遶郭斜。

海上

天幕紛紜海水浮。日車東上惡埃收。金鉤欲下靈鼈飾。鐵網將沈寶樹愁。自昔神仙嘗有藥。從來銀闕不

通舟燕酌餐盡蟠桃熟。會約琴高控鯉遊。

夏日舟行

箭激雲檣五兩輕。波光飛入射桃笙。山眉遠映羣鷗過。霞綺新和落照明。甘醴更無消暑意。文竿徒有羨魚情。飄飄若得乘羊角。直待銀潢上玉清。

送呂解元江陰禮席

玉人仍是紫芝眉。五世嘉占得鳳飛。果滿軍中潘令去。馬盤樓下庾郎歸。東牀寄傲便便腹。北路騰裝粲粲衣。九燭夜堂開喜宴。畫鸞交扇接香幃。

送祝熙載赴金華主簿

數路收才漢得人。物塗聊試半通輪。宸廷唱第瑤光近。仙簡刊名玉字新。芳桂行吟關外月。香葩回夢苑中春。平時官下文移少。日涉閒園戲綵頻。

泛舟

瑟瑟涼波冷接空。恍疑雲物畫屏中。一篙海客乘槎水。兩槩仙人取箭風。秋色暗欺荷蓋紫。夕陽偷射桂旗紅。長來此地無窮樂。珍重箬簷與釣筒。

送王龍圖頌赴荆南

南部行臺駐萬兵。繡衣歸路有光榮。龍圖往時領漕荆北。別墅復在武昌。鳴鏡虎豹林中避。吹角蛟龍水底驚。湘樹遠從

湖外出。峽雲時向馬前生。主人落筆多風調。應唱新辭徧郢城。

送陳鐸歸吳興

六篇高論吐虹蜺。報罷扁舟擊汰歸。地上麒麟須遠到。天邊鷹隼且卑飛。秋來茗下醪醅熟。寒去江頭鱸縷肥。莫嘆隋和猶未售。玉蟾濡翰待君揮。

寄題雄州宴射亭

北歷三關氣象雄。主人仍是紫髯翁。樽前樂按摩訶曲。塞外威生廣莫風。龍向城頭吟畫角。鴈從天末避瑯弓。休論萬里封侯事。靜勝今爲第一功。

送吳江知縣陳著作

南望湖山畫一屏。松江江水向人清。何如嶮嶮聊爲活。況是瀟湘謾得名。雙槩有時青翰遠。兩衙無事素琴橫。遙知惠政通和氣。乳雉馴鷗自不驚。

贈華陽道士朱尊師

卻餌英芝養道芽。赤霄曾輟絳雲車。眼看碧海成夷路。心記蟠桃結實花。東府靈方修白石。上清香飯給胡麻。兩雙條脫皆金玉。可是南山萼綠華。

仲夏有感

誤逐時英落穀中。拙艱爲吏悄無惊。鷄鷓已享鳴鐘賜。澣統焉知裂地封。西北晚雲長望闕。東南春畝久

拋農忽忽禹鑿當年事。猶待神雷起蟄龍。

上元禁樂

丙子歲

此夜重城風腦寒。放遊車馬接通關。漢祠歌罷天壇冷。鈞奏聲沈帝所閒。紅蠟枉殘春色裏。青樓空占月明間。仙壺定有尋芳處。公子雕鞍兩兩還。

暮冬離京師

雪中愁買出關符。又著青衫事府趨。燕市有金還貴馬。鄧林無樹可棲烏。鴟夷痛飲傾家釀。如意狂歌缺唾壺。朝野多歡天子聖。目瞻東闕步踟躕。

感舊

萬里青雲未致身。馬蹄空踏幾年塵。曾迷玉洞花光老。卻過金城柳色新。粉壁已沈題鳳字。酒壚猶記姓黃人。塢中橫吹偏多感。一涕闌干白角巾。

落葉

霜華昨夜拂秋林。翮落紛紛不自禁。清吹無時來檻底。紫苔相伴住牆陰。空餘倦鶻求枝宿。更剩殘蛩抱樸吟。萬物歸根真趣在。卻緣江月識禪心。

嘲蝶

三春流寓寄花房。雌去雄飛過短牆。雙翅薄勻何晏粉。一身儉帶買充香。風多苑後飛無數。日煖池邊舞

更狂。卻爲有情人愛惜。六宮皆作繡衣裳。

飛將

曾從嫖姚立戰功。朔方猶畏紫髯翁。雕戈夜統千廬會。緹騎秋收五柞宮。後殿拜恩金印重。北堂開宴玉壺空。從來敵國威名大。麾下多稱黑稍公。

公子

北第當衢載有衣。巾帷鮮媚僕如犀。萬錢供箸鳴鐘沸。三組垂腰佩玉低。座上賦鸚窮處士。樓前盤馬小征西。去天尺五城南路。此去青雲別有梯。

古別

長道何年祖輟休。風帆不斷岳陽樓。佳人挾瑟潭河曉。壯士悲歌易水秋。九帳清油徒自負。一作貴。百壺芳醕豈消憂。至今長樂坡前水。不啻秦人怨隴頭。

函谷關

天開函谷壯關中。萬古驚塵向此空。望氣竟能知老子。棄繻何不識終童。謾持白馬先生論。未抵鳴雞下客功。符命已歸如掌地。一丸曾誤隗王東。〔案〕隗王。今宋詩紀事刊本。作隗生。請以一九泥。爲大

王東封函谷關。卽胡宿詩句所本。刊作隗生者誤。附識于此。



# 文恭集卷四

## 七言律詩

塞上

漢家神箭定天山。煙火相望萬里間。  
弊利請盟金七酒。將軍歸臥玉門關。  
雲沈老上妖氛斷。雪照回中探  
騎還。五餌已行王道勝。絕無刁斗至闐顏。

湘夫人祠

翠華獨去蒼梧野。紅袖同沈楚水濱。  
休把蘭湯招怨魄。空留竹淚憶明君。  
風前有恨啼湘瑟。天外無言擬  
峽雲。不比石城雙姊妹。帝家釐降有遺文。

隱客舊居

鶴版飛書到此山。海簪重拾更彈冠。  
腕中紉佩荒蘭葉。石上移文蠹辭癡。  
蕙帳煙空胎化老。柏庭風起麝  
香寒。至今門外潺湲水。疑是幽人賦考槃。

寄題公儀西溪

山公休愛習家池。自有清光灑一溪。川上好風跳鱖鯉。波中晴日浴鳧鷖。孤舟小嶼閒如畫。釣線輕緝靜可攜。更助吟毫無限思。落霞猶共夕陽低。

送莊賢良權之歸舊隱

過我東還鑑水涓。儻逢親友話襟期。書鉗紙尾丞眞負。易在牀頭叔自癡。僕近學破扉數間將整整。踐更三載且遲遲。開書舖家有指僕爲暗闕者。○〔案〕註中暗闕二字未詳。無別本可校。姑仍原本。督郵少屈吾衰矣。三徑歸來未有資。

送向館使赴陝郊

陝服由來二伯居。使君新詔擁犀渠。門連象魏施行馬。地控崤函佩左魚。世德高華河裏舊。土風淳厚召南餘。政成期月須嚴召。行見追鋒走傳車。

送江寧監軍李舍人歸闕

假節彌年去玉墀。星郵傳詔紫芝泥。帳中密印交龍虎。麾下全軍解水犀。仙闕歸心春槩快。石城離思晚雲低。宣平貴里天姻盛。競爽行看對析珪。

城東別墅寄懷天錫

幾日歸心托暮雲。半氈牕下久生塵。水天雨氣霏霏斷。竹閣山花點點新。小苑鶯聲偏破夢。大堤花豔欲迷人。豈無躑躅青絲騎。不敢偷看城裏春。

送魏屯田出守山陽

左臺分契領東廳。入奏清廂幾刻移。三采綬章秦服志。兩轡朱色漢官儀。雌堂夕宴沈寶轄。〔案〕雌堂二字。集中屬見。未詳所出。攷郡國志。太守所居。塗以雌黃。故稱黃堂。此名雌堂。疑卽取雌黃之義。今俱仍原文。綠野春耕駐使旗。盤錯寄才知不久。英輿六尺待飛綬。

和承旨尙書觀春物欣盛之什

紫陌年光天上回。東風吹雪放新梅。燕鴻卻背南雲去。楚鳥還迎社日來。半綠萍醅浮臘脚。殘紅桃豔弄香腮。山公知有登高興。樽下容誰獻壽杯。  
書觀春歸雪意殘。三竿初日照天關。魚聲稍煦芳塘面。鵲語頻跳碧樹間。渠落禁中聽御水。閣凭空際數前山。柳黃梅白東郊近。未得攜壺一日閒。

江城春日

暮春江色映芳菲。雨後清和滿客衣。遊騎自穿官柳去。落霞常伴彩橈歸。錦鱗劈浪深深躍。翠羽迎風兩兩飛。因下短亭猶惜別。萬枝香雪在薔薇。

謝惠詩

君詩來。既我難當。語帶誠齋句妙香。〔案〕誠齋乃楊萬里自號。此首疑南宋人詩。誤入集中。或當時別有其人。亦未可定。今姑存之。鮫室垂垂新下泣。蠙珠顆顆爛生光。魂飛錦里花爭巧。夢到池塘草又芳。早晚交遊逢大手。急將名姓爲傳揚。

送張著作任蘄水

家世南州擅席珍。君之先正世踐甲科。斗城傾蓋底相親。誅茅三徑原同閉。枕水雙扉重作鄰。翰墨初通文苑職。

弦歌聊嗣武城人。楚詞舊學精章句。未得金門薦買臣。

和春卿學士登定力寺北閣兼寄絳倅富彥國監丞

玉山偷暇訪禪扉。洛社諸英昔所依。三鳳同時翔翕去。二龍相繼得標歸。天聖中。春卿昆仲三人。同絳倅監丞。相次並登制舉。後數年。春卿復與

之首。文勝今爲美談。硯池終歲貪殘墨。講樹經秋長舊圍。更待碧紗籠美句。始驚章布有光輝。

送李留後赴天平

留印高提駕伏熊。鄆城襟要此臨戎。四封土俗弦歌盛。九疊霜天鼓角雄。風月靜歸談笑內。山川遙入撫

綏中。居多暇日溪堂勝。不廢投壺與釣筒。

寄浙漕晉卿李工部

名臣分刺十三州。君在東南第一流。郡國成風皆自化。朝廷安枕更無憂。江湖莫作多時計。山水何妨暇

日遊。誰與二天相對飲。看看八月弄濤頭。

送兵部陸學士赴漕閩中

宣風一面得甌閩。丹舸乘流破月痕。玉色暫辭當牖坐。衣香初隔止車門。帝臺回望相竿遠。仙嶠重過射

的存。君自會稽任重。赴使漕。曾頌天禧金石刻。定應寬利賦朝恩。

送杜偉長學士赴漕河北

甘陵孤壘起纖埃。趨詔東南武庫來。天子此時知國器。生民從古寄賢才。神鋒立斷無留刃。籌筆先機有疾雷。行見司徒封露布。鄴城歌舞夾行臺。

送陸兵部赴漕湖南

甘泉司計署名高。出拜行臺帝綰褒。使節遠籠三壤賦。官儀清坐七兵曹。時平漢斧宣威力。歲稔湘帆繕貢勞。秋晚洞庭山水秀。定知懷古費宮毫。

送御史蔣公赴漕江東

籌筆天階柱下官。孤風凜凜振臺端。坐曹常佐甘泉計。奏事曾紆武帳冠。一日雕龍分使節。幾年聽馬避朝鞍。商功未是須賢地。荷橐行歸侍玉鑾。

送石舍人得告展省

先賢富貴重夸鄉。況復哀榮感履霜。三最詔書新予告。九原恩澤遠生光。老人競醉金錢少。稚子爭牽玉佩長。苟令池頭芳樹在。栖雞浴鳳日相望。

送石舍人入西閣見紫薇花盛開

西臺重見紫薇花。天上時時好物華。人向藥階升禁掖。舍人初上故事壓角路從桃水入仙家。香英半落風前酒。高豔遙烘日際霞。卻憶後齋濃睡覺。芝泥初熟午陰斜。

寒蟬

槁葉驚秋樹，幄稀嘶蟬猶尙警寒枝。玉琴可要傳深恨，珠露何妨刺薦饑。已伴風箏流遠韻，更邀霜籟散餘悲。清漳病枕無惊久，月夕煩君住少時。

三衢道中馬上口占

短亭疎柳映鞦韆，馬上人家穀雨前。幾樹槍旗茶罷罷，一溪鱗甲水潺湲。鶯期別後聞餘哢，古詩鳥鳴兮友之期。蠶候歸來見小眠。可惜西湖湖上月，夜來虛過十分圓。

送張待詔知越州

長安廐吏馭花驄，竹使遙分瀾水東。遠勢早推賢相子，太傅三當國稱公常遠嫌避事。任誠真有古人風。稽山一鎮居封內，四鎮之山。阿閣三休聳禁中。長樂鐘聲偏怨別，何時同謁建章宮。〔案〕永樂大典載胡宿寄會異云不及臨滄陪置酒。憶君千里寄書簡。其前六句及小註。並與此同。今弗復存。附識于此。

送陳學士知常州

金斗城高二浙西，使君初拜武都泥。射堂五色開雲的，齊隊千兵衣水犀。仙閣舊香芸辟蠹，使軒新蔭李成蹊。下車定有中和曲，索米州民日倚觀。

覽朱表臣卷

烏巷名生卓不羣，階庭相伴玉枝薰。天邊禁樹開龍鳳，筆下清才墜鳥雲。三級火雷何日化，一堂金竹此時聞。牛心割炙探來嚼，爭得英瑤去報君。

覽孫祐甫卷

君家先正隱瓊材。巖石清聲動漢臺。地底何年埋玉樹。蚌中今幸產珠胎。氈書未挂千名榜。豆詠爭傳八斗才。荆壁夜來煩抵鵲。寶編三復翳瞳開。

南至之日輦下書事呈正卿于高二同年

歲暮繁雲結夕陰。長安客舍費黃金。燭牕明暗翻歸夢。雪屋清寒著旅衾。寶騎傳呼三陌廣。銅龍飄點九門深。萬年壽酒無因上。陽藿空傾向日心。

芙蓉湖泛舟

小湖香豔戰芙蓉。碧葉田田擁釣蓬。嵐氣欲飛山隔岸。秋光不定水搖空。翩翩雪鳥爭投浦。撥刺霜鱗鬪擲風。正是滄浪濯纓日。一竿多謝紫溪翁。

過李白墳

平昔馳名蜀道難。旅魂流落古苔斑。土中寶樹埋何在。澤畔靈魂些不還。醉後煙霞仍物外。吟餘風月尙人間。一哀弔罷頽陽暮。江北江南盡是山。

送致政祕丞

二紀青衫拂洛塵。桂香消盡故時春。徑爲天上乘槎客。厭作河濱託乘人。老筆工詩殊覺麗。清談傾座幾相親。臨滄送別多瑰藻。上樞太尉中憲左丞而下。同勝之舊。皆有詩寵行。三徑歸資莫歎貧。

送致政吳賓客

挂冕高辭九列榮。年如園綺尙康寧。水蒼乍解趨朝佩。雲母初閒隔暑屏。商嶺紫芝歌幾曲。武夷毛竹夢頻驚。門前已見施行馬。更待沙堤接鯉庭。

寄致政蔣侍郎

八十礚谿用釣翁。丈人冰雪在顏容。乞身未及調綠鵠。濟世何當起臥龍。先覺合名侔大蔡。後彫遐福集寒松。憐才好客還依舊。終日清談綠酒醲。

和承旨給事寄酬南京致政杜相公

賢相辭榮鬢未斑。濟川舟楫一朝閒。蒼生猶望安車起。使者空持拱壁還。去秋明堂大饗。老。優詔陪祀。辭疾不至。郢曲傳來都輦下。蕭規留在廟堂間。壯猷全德知難尙。後世高名重太山。

涼思

昨夜南星破暑威。月波浮動杵天垂。露華冷向三危滴。秋色新從一葉知。越水舊歌迷桂楫。楚江秋思遶蘭旗。桃笙碧滑人無寐。欲借蛟盤寄所思。

涼州

一從天寶陷涼州。路絕陽關數百秋。誰念弓裘侵紫塞。空餘歌舞在紅樓。將兵古有龍韜略。仗節今無燕頷侯。五鼎元戎方肉食。腐儒何者預軍謀。



送姚祕校歸書

若溪曾是忝朱輪。鳴鹿當年預送賓。楚國頻嗟三獻璞。漢廷裁得半通綸。勞歌未免吟梁甫。作賦還應問大鈞。下澤乘車知道在。折腰那久滯風塵。

寄蕪湖吳殿丞

大花灘外憶琴堂。西北山長水更長。縮地何曾人有術。摩天不及鳥能翔。寒梅弄臉英英態。臘甕蒸醅滿滿香。悵望未休還悵望。夜來庭下月如霜。

寄臨淮蔣使君

漢臺分刺輟名臣。隼旆還臨馨水濱。殿石乍辭龍尾遠。印盤初結獸頭新。貫花佛會連香刹。種杏仙陰接寶鄰。荆府依劉心未獲。卻憐馴鹿伴行春。

和吳春卿早春卽事

臘過春雲尙帶陰。故山迢遞憶青岑。芸齋舊帙書籤冷。桂甕新香酒蟻深。複道風煙殊可眺。曲江花柳試偷尋。芳樽一笑真難得。永埒何曾有剩金。〔案〕永埒二字。原本作永埒。埒字義不可解。攷顧延之語白馬賦。有角壯永埒句。此詩當本之。今改正。

寄龍圖李諫議

虎符兼綰鐵林兵。安輯南方十二城。昏曉星文通翼軫。陰晴雲氣接巫衡。江飄畫角蛟龍思。風獵干旗鳥隼鳴。誰伴使君紅燭宴。漆堂深夜促銀筵。

送林學士赴明州

綠綈膺檢出神州。又保東吳最上游。腰下金符分半虎。手中庖刃欠全牛。金尊酌月吳歎席。錦纜牽風越鄂舟。正是金華隆舊業。羣仙相望在瀛洲。

送施屯田守姑熟

臺城南畔擁油韜。四十名郎此夢刀。文陛入辭交戟密。太微回望積星高。醉羅定費齋中酎。吟管應催石上毫。莫戀江東佳麗地。歸來開院接金鼇。

寄江淮太守表臣職方

畫省高才滯兩輜。秋來依舊對淮山。一函星斗龍淵在。萬里風雲驥足閒。賦詠且裁紅燭下。卷懷聊寄綠樽間。次公治行聞當厲。二節如今卽召還。

送宗兄郎中守三衢

新舊鞶囊兩獸頭。東南鄉郡得龍丘。朱丹侯轂聊行縣。紫翠家山更滿樓。高第郎官猶應宿。中材裨將輒封侯。浩然能養浮雲志。風月樽前且獻酬。

送譚寺丞守鬱平

金契爲州復侍親。卻從湖際訪仙村。花垂晚席傾家釀。柳拂春車過里門。關內已誇新組去。浦中仍見舊珠存。名園日涉庭無訟。絲管時時薦壽樽。

集賢石學士出守符離

日邊新擁兩朱轡，亦以斜飛試羽翰。巴郡詞人才藻壯，漢家循吏教條寬。明光奏事衣香在，麗正修書硯  
滴殘。歲晚政成丹詔下，歸來天上作仙官。其後未期歲還臺尋登西掖

殘花

雨壓殘紅一夜凋，曉來簾外正飄颻。數枝翠葉空相對，萬片香魂不可招。長樂夢回春寂寂，武陵人去水  
迢迢。忍將玉笛傳遺恨，苦被芳風透綺寮。

和承旨宋尚書告中之作

鵲聲頻繞大槐枝，鼇禁權開舊老歸。哆舌人間無翕贊，奎鈞天上有晶暉。西山五色分靈藥，南極三光接  
太微。只待延英朝筮日，便應調鼎向黃扉。

橘

龍陽洲上密于星，紅實纍纍照日明。露濯曉枝金色重，霜封秋蒂粉衣輕。楚江未分萍如蜜，漢殿何曾蔗  
析醒。誰道相如能作賦，詔園先熟是虛名。

送次道學士倅洛中

留籥初均相府勞，辟書先下得虔刀。黃圖氣象占龍闕，丹穴精神識鳳毛。集山景祐中侍宣獻公在洛一代策書承世  
學。國朝大典出宣獻公手三川風月屬詩豪。山公更有通家舊，應許論文醉醪醪。次道復受詔同修唐史

送周屯田倅南徐

瀟河分鎮壓東西。鐵甕由來重會稽。地勢頓驚江海近。天文全覺斗牛低。鳴秋鼓角翻朱鷺。映日樓臺拂彩霓。綠髮名郎才韻秀。政成看捧紫芝泥。

送子思學士倅河內

左符通掌日邊城。幾蔭華棧奉刺經。直舍十年苔已紫。吟鞭一路柳初青。禁中夜闌拋行月。郊外春車駕屏星。河裏舊遊從古盛。好尋煙幌弔遺靈。

送薛監丞倅絳臺

故絳山川宰樹存。屏星分守出宸恩。官榮此去夸鄉組。家法從來式里門。別舜正憐黃菊綻。征鞍猶怯黑貂溫。守居舊號園池美。應伴山翁把翠樽。

贈梅聖俞試館職得賜進士出身

賦就甘泉客薦雄。獨攀仙桂向秋風。抽毫同列三英座。換骨纔爭第一功。警看靈鼈居水下。恍聞伏犬吠雲中。嫦娥應有憐才意。惟許詩人到月宮。出雪齋廣錄。

卜居

自致青雲有壯圖。且尋詹尹卜幽居。一杯誰置元王醴。三尺休彈上客魚。足下已穿東郭履。胸中猶鬱茂陵書。漢皇夜御金鑾殿。豈便無人薦子虛。

淮南王

貪鑄金錢寫符。何曾七國戒前車。長生不待爐中藥。鴻寶誰收篋裏書。碧井牀空天影在。小山人去桂叢疎。雲中雞犬無消息。秀麥漸漸徧故墟。

送劉觀察赴襄陽

甲隊霜秋瑩武蠶。萬兵都府去臨戎。習池峴首風流遠。漢水方城氣象雄。宴榭鳴鼙飄畫鼓。射堂棲鵲試雕弓。平時公子推能政。愛日遙知徧境中。

寄題徐都官吳下園亭

吳下新居樹石中。綠巖香葉一重重。潺湲枕上聞流水。縹緲簷間見好峯。山客對茶閒覓劫。野僧留話幾侵鐘。由來止足前賢事。他日何慚邴曼容。

長卿

買賦金錢出後宮。長卿文采冠諸公。梁園未至時名大。蜀道前驅使節雄。已託焦桐傳密意。更因殘札寄遺忠。如何一諷神仙事。卻得飄雲起賦中。

洞靈觀納涼

秋波不動簾紋融。松月愔愔透綺櫺。霜重井梧翻瘦碧。雨回堦藥墮嬌紅。彩鷺靜占銀塘水。乳燕涼飛玉宇風。秫酒易銷殘夢斷。卻疑身在廣寒宮。

天街曉望

長樂纔聞一叩鐘。百官初謁未央宮。金波穆穆沙隄月。玉樹瑤瑤上苑風。香重椒蘭橫結霧。氣寒龍虎遠浮空。嗟余索米無人問。行避霜臺御史驄。

寄昭潭王中立

高弦一弄武陵深。六幕天空萬里心。吳苑歌驪成久別。楚峯回雁好歸音。十千美酒花期隔。三百枯棋弈思沈。莫上孤城頻送目。浮雲西北是家林。

次韻徐爽見寄

五兩青絲帝渥深。平時可敢嘆英沈。侏儒自是長三尺。澠滸都來直數金。寂寞死灰人喪偶。婆娑生意樹交陰。年來想見瓊枝色。久夢蘧蘧到竹林。

雪

屏翳驅雲結夜陰。素花飄墜惡氛沈。色欺曹國麻衣淺。寒入荆王翠被深。天上明河銀作水。海中仙樹玉爲林。日高獨擁鸚鵡裘。臥誰乞長安取酒金。

城南

昨夜輕陰結夕霏。城南十里有香泥。初聞山鳥驚新哢。遙見林花識舊蹊。蕩槩遠從芳草渡。盤巾還傍綠楊隄。羅敷正苦桑蠶事。惆悵南來五馬蹄。

早夏

井轄投多思不禁。密垂珠箔畫沈沈。睡驚燕語頻移枕。病起蛛絲半在琴。雨徑亂花埋宿豔。月軒脩竹轉涼陰。一春酒費知多少。探盡囊中換賦金。

宿秀峯寺

夕鐘初斷海鯨音。投宿香園半翠岑。冰簟漫牀消客夢。水簾澄月伴僧吟。雄風拂枉清涼極。珍樹交柯翠霧深。一夜漢陰機事息。草堂虛論破煩襟。

太湖石

海岱鉛松妄得名。洞庭山腳失寒瓊。漱成一朵孤雲勢。費盡千年白浪聲。誰向機邊逢織女。直疑巖下見初平。年來賞物多成病。日遶蒼苔幾徧行。

過桐廬

兩岸山花中有溪。山花紅白徧高低。靈源忽若乘槎到。仙洞還同採藥迷。二月辛夷猶未落。五更鴉白最先啼。茶煙漁火遙堪畫。一片人家在水西。

憶薦福寺牡丹

十日春風隔翠岑。祗應繁朵自成陰。樽前可要人頽玉。樹底遙知地側金。花界三千春渺渺。銅槃十二夜沈沈。雕盤分筴何由得。空作西州擁鼻吟。

次韻和朱況雨中之什

蒼野迷雲黯不歸。遠風吹雨入巖扉。石牀潤極琴絲緩。水閣寒多酒力微。夕夢將成還滴滴。春心欲斷正  
更一作霏霏。憂花惜月長如此。爭得東陽病骨肥。

沖虛觀

五粒青松護翠苔。石門岑寂斷纖埃。水浮花片知仙路。風遞鸞聲認曉臺。桐井曉寒千乳斂。茗園春嫩一  
旗開。馳煙未勒山亭字。可是英靈許再來。

淮南發運趙邢州被詔歸闕

天臺封詔紫泥馨。馬首前瞻北斗城。人在函關先望氣。帝于京兆最知名。一區東第趨晨近。數刻西廂接  
畫屏。正是兩宮裁化日。百金雙壁拜虞卿。



# 文恭集卷五

## 七言律詩

### 雪後登祕閣

消盡層陰上盡梯。雪餘官瓦弄晴暉。碧簷交照虬爭聳。朱闕相聯鳳欲飛。日向金溝春溜動。風來珠樹曉寒微。帝家池籩饒芳物。白鳥翩翩接翼歸。

### 謝叔子楊丈惠詩

老子詩名久廢聞。喜君步驟少陵壇。句敲金玉聲名遠。韻險車斜心膽寒。傾出囊中和月露。皎如盤底走珠丸。苦藏難沒詩家事。會看塵冠早一彈。

### 又和前人

作者傍邊好見聞。速來就汝作比隣。詩中活法多無子。眼裏知音有幾人。爾許精奇花燦筆。豈容塵俗海翻銀。老夫幸有千機錦。尙欠江頭一浣新。

### 侯家

洞戶春遲漏箭長。短轅初返洛城傍。彩雲按曲青岑醴。沈水薰衣白璧堂。前檻蘭苕依玉樹。後園桐葉護銀牀。宴殘紅燭長庚爛。還促朝珂謁未央。

秋風

瑟瑟新聲脫綠槐。半寒天氣日相催。西樓夜色吟偏好。南國朝雲夢未回。翠影暗牽蘋葉動。清香遙獵桂枝來。重陽漸近松醪熟。白菊如何爲放開。

送馬少卿赴襄陽

冰操從來畏四知。漢江南畔擁藩麾。地經謝守開油幕。人憶山公倒接羅。風入射堂飄鼓吹。雨隨行縣濕旌旗。前朝叔子流遺愛。拂蘚應看峴首碑。

送寶應李尉

曾飛麗藻清堯問。猶屈長才尉楚城。官是神仙標秀領。縣因靈寶紀嘉名。西崑已挾凌雲譽。外戶全消擊柝聲。早晚聲名來謁帝。會看雙璧賜虞卿。

竹

修篁百个靜無埃。憶共山僧競日栽。天矯翠虬身欲化。婆娑青鳳尾全開。風含爽籟依朱檻。月鏤青陰覆翠苔。曾爲檀欒衝雪看。玉枝相亞曉燈檠。

送周學士歸永嘉

三最初承予告恩。攷校有校正之最。一雙青輸出都門。關繡舊棄人多職。橋柱前題墨未昏。南國歸雲聊送目。河梁新月暫消魂。玉山丹府重來日。好拾風謠奏帝聞。

送聶學士赴闕

臺召西來二節榮。清江浮舸鴨頭平。十行受詔龍綸重。五兩占風鳥羽輕。目送華林春雨色。夢隨長樂曉鐘聲。竚看隻日延英對。九墨宮毫屬長卿。

送張學士赴邵武兼過吳中別墅

青藜香地掩殘書。越絕東南駕隼旗。紫陌花期經祓禊。清淮潮信待蟾蜍。鳥聲百囀春芳際。鷺候三眠夏葉初。吳地吟朋如見問。爲言江令憶鯢魚。

寄張唐公學士

朱航東下忽經春。藏室離居作惡頻。簡上蠹蟬終日在。唐公受詔同修南北史。未訖。有請應之行。樹間靈鷲至今馴。唐公前。有鷲棲止庭樹。久益馴狎。北宮自有啣嚙客。天祿誰同寂寞人。昨夜西牕有佳月。此心迢遞思冰輪。

千葉瑞荷花

絳藥層層吐翠羅。水妃冠重曉峩峩。應嫌舊本開花少。卻鬪榴房著子多。含露自知芳意在。偃風無奈落英何。更憐玉骨藏深怨。暗結千絲在綠波。

題漣漪亭

檻底凝漪碧漫天。角巾東路主人賢。汀花照席供春醉。沙鳥窺簾伴晝眠。何必馭風追汗漫。不妨乘月弄潺湲。流杯若做山陰事。兼有蛙聲當管絃。

津亭

津亭歌闋戒棠舟。五兩風輕不少留。西北浮雲來魏闕。東南初日背秦樓。層城渺渺人傷別。芳草萋萋客倦遊。平樂舊歡收未得。更憑飛夢到瀛洲。

有懷松江

多年襍被玉山岑。鬢雪欺人忽滿簪。駑馬雖然貪短豆。野麋終是憶長林。鱸魚未得乘歸興。鷗鳥惟應信此心。見說新橋好風景。會須乘月濯煩襟。

寄題齊氏山齋

有客稽山岸角巾。寶書盈笈日怡神。雲銜別嶺摺筇久。月上前峯隱几頻。牕上蘿陰猿警旦。塢中茶候鳥啼春。一經鄒嘯能傳世。子舍于今兩綬新。

送崔諫議都運河東

行臺西北接參墟。仗節重乘駟馬車。水是晉君沈璧後。地經唐叔賜圭餘。蕃酋重足虔條教。部吏承風畏簡書。武帳歲終還奏事。康侯三接聽新除。

送益州運使田學士

劍棧秋旗拂過鴻。行臺西去撫蠶叢。民間幼艾餐和氣。徼外西豪偃德風。巴漢靜歸籌筆內。岷峨閒入畫圖中。時平幕府無留事。樂職何妨頌聖功。

寄題蘭皋亭

亭下春芳接楚波。金堤勃窣路相過。牕中霽景煙姿遠。簾外晨香露氣多。紅頰倚牆花竝蒂。綠陰翻檻樹交柯。朝陽定有浮杯樂。醉墨何妨記永和。

採蓮女

碧蓋紺葩映素秋。此中蘭櫂好銷憂。相將共挈青絲籠。一笑同迴翠羽舟。日暮鳴榔隨下瀨。夜深歸櫂怯中流。東方自有羅敷媚。不願江邊越鄂州。

送柳先輩從事桐廬

甘櫻離會酒初醒。還赴東侯拱壁迎。江上桃歌傳樂錄。坐中鸚鵡占賓榮。仙車過洛人偏識。繡騎還邛客盡傾。後夜嚴州臺上望。紫雲西北是神京。

寄杭州子文屯田兼簡真公上人

目斷江南佳麗城。欄干樓角幾長凭。越人抱膝吟偏苦。吳客觀濤病未能。此地旂檀多勝剎。一時龍象有高僧。知君暇日尋猿鳥。閒上靈峯第幾層。

寄題王舍人書齋

此第當衝拂斗魁。竹林清暑似巖隈。將壇緒業傳金版。文苑新書集玉杯。數篋龍拏藏寶刻。一泓蟾滴試烟煤。好辭戴鷁飛千牘。東武原從禁衛來。

霜野

啄兔青骹直下飛。霜雲慘慘楚楓披。秋林月迥聞樵斧。晚市風沈見酒旗。江上敗荷無限柄。雨中殘菊不盈枝。物華怨盡仍傷別。塢笛聲中一涕垂。

送陳諫東歸

顏詩攜錦有高文。席上經年未聘珍。鵠板乍停公府詔。貂裘還敵洛城塵。雪園授簡誰爲賦。煙渚歸艎不待春。何日子虛聞夜甯。尙方給札對嚴宸。

送華濟東歸

江上丹楓墮夜霜。式微愁思豈禁傷。壯圖萬里青雲在。舊徑三條碧草長。匹馬歸來江練白。惡氛收盡楚天涼。大明繼照光華旦。提筆相期翰墨場。

五言排律

郊祀慶成

齋輅度郊報。祠宮就國陽。繁雲猶待族。霽日忽迎長。圭璧紛佳氣。粲盛馥異香。人情欣眷祐。天意益端莊。

被袞侵寒霧。升壇躡早霜。左方虛小次。午陛卻中黃。六樂乾祇格。三登海宇康。千官森劍珮。萬里走梯航。神筭膺符命。天壺飲福祥。從今瓜瓞慶。鼎業熾彌昌。

關前紫薇花

高鬟美人髻。妝閣一何鮮。迷路來春後。開花近日邊。居當澆御水。動欲絢非烟。分潤從仙掌。流薰自帝絃。雅當翻藥地。繁極曝衣天。花至七夕猶盛。色映芝泥熱。香交蕙炷燃。吟殘秋藥脫。睡起午陰圓。應笑憑欄者。相看已幾年。

陳生遊金山兼簡世昌師

寶勢嵐光秀。濃春物景鮮。飛峯凌巨浸。精構起中天。鳥畏雲濤險。僧安石室禪。貫花應作偈。望月定陳篇。不爲青霄桂。同裁白社蓮。羨君飄鷁舫。獨自號神仙。

狀元張監丞倅陝郊兼之闕中省親

藻袞御中楹。詳延得世英。賓鄉具三物。題塔冠千名。玉擅崑山價。笮兼仲氏聲。平淵二龍躍。碣石一鴻輕。慈宴堯廚洽。宸章禹律鳴。入辭瞻翠葆。去候過朱櫻。贊治嶠陵險。歸寧蜀棧橫。都門百壺送。宿館五漿迎。帝所銜標雋。親前戲綵榮。勒銘知有作。叱馭肯辭行。桂色宵宸秀。棠陰蔽蒂清。期年隨詔入。脩路接瑤京。歲晚禁直呈承旨侍郎同院五學士

廣內施重闔。承明敞直廬。上清通帝所。方丈擬僊居。漢帝前釐席。淮王重報書。時宗登賈馬。暮召得嚴徐。

公玉至光秦璽秦璽和氏璧爲之珠來照魏車。高文參正始。密旨奉權輿。王澤宣從綍。天香對滿裾。論思皆藥石。效唾亦瓊瑤。弱水滄波在。然山老墨餘。容籟朱鴈刻三朝御什宸翰白龍摠太宗飛白書寶肆遺容礫。珍林誤植樗。匪躬無饗饗。每食有渠渠。寒日分宵直。繁雲向歲除。九門催鑰下。三殿警籤初。北斗低層掖。明河拂太虛。求衣欽德盛。襪被省才疎。多病長思越。知非晚學遽。煙霄叨步武。江海隔樵漁。榆性誠爲鈍。葵心但欲舒。日祈同舍進。躋俗到華胥。

次韻曼卿冬直因以勉贈

八舍嚴周衛。千門肅漢闈。金胥催遞宿。玉羽伴歸棲。禁樹驚寒斂。僊雲拂夜低。星河紫牆外。霜月碧城西。汲字紛難整。鈞音悅易迷。有人歌白雪。此曲妙清溪。文獻初登亮。君王益徇齊。因知函鼎器。那復久烹雞。

后土觀瓊花

楚地五千里。揚州獨一株。香名從此貴。芳格灑然殊。國艷何勞粉。天姿不掩瑜。濃薰霏麝氣。細藥列蜂蠶。雲朵垂三素。仙衣著六銖。吳中休插柶。天上枉栽榆。神物疑長擁。靈根此末枯。人間如定價。百琲睡龍珠。

石曼卿學士輓詞

才出羣英表。文推一代雄。靈蛇操掌上。雲夢納胸中。醉墨千峯立。吟毫八極空。居官疎皎覈。處世倦磨礪。綠酒常埋照。清琴自寄通。昌言曾拂治。密疏早談戎。曼卿天聖中建言。武備宜置土兵。天子知亭伯。實元初。西戎犯邊。始行其策。時人重孟公。何言執戟滯。便到闔棺窮。鴛鳥巢門止。驂驢揭櫪終。芝筋留御帳。曼卿受詔。書李文靖公神道碑。石本奏御之日。



有司以受補不起。簫賦落王宮。〔案〕簫賦原本作簫武。義不可解。攷漢書王褒傳。褒曾著洞簫賦。上深嗟惜之。此詩蓋兼引二。元帝爲太子時。令後宮皆誦之。文選載其文。則洞簫賦非也。與傳小異。此詩蓋兼引二。薄葬依莊叟。殘書付所忠。惟餘身後得。凜凜是英風。

### 射熊館

別館拋雙闕。飛除鎖一方。黃山縈蹕道。青檜遶宮牆。緹騎千羣合。周陔四面張。管絃繁欲沸。旌旆鬱相望。走馬長楸密。更衣別寢涼。星飄肅慎矢。雪擁羽林槍。懽樂何曾極。盤遊不可狂。吾聞堯舜治。垂拱在巖廊。

### 將家子

北地良家子。山西舊將兒。新從羽林射。得赴鴈門期。橫死人無比。微行世不知。長安偏重俠。趙國素多奇。照地連錢錦。迷春鑿落卮。喝盧燕市客。顧笑楚臺姬。烟樹黃山路。霜雲白草時。雕弓孤月滿。騁馬一塵隨。應手雙雕落。回頭赤日移。卻歸東第去。高宴九燈枝。

### 詔福聖宮燒香

微道西華內。觚稜北斗傍。神靈安肯構。思澤賜燔香。渤澥通驪窟。崑崙拱畫梁。清壇浮早景。碧瓦霽初霜。甲帳嚴如在。丹簷迴欲翔。隆姿瞻漢后。餘烈畏軒皇。埋劍橋山遠。游冠閣道長。白雲迷處所。仙人掌相望。五岳扶封域。三辰緯典章。升歌留寶鼎。刻號在神房。盛德尊原廟。遺仁睦鬼方。聖文名善繼。百世溢流光。

### 歲除

暝色疑無際。寒雞悄未晨。莫枝將換朔。斗柄漸歸寅。水火猶分漏。龍蛇尙墊身。四時寧有暇。萬物又勞春。

樹喜丹葩秀。人憂白髮新。明朝趨寶殿。誰是奪重茵。

送楊中允宰常熟

丹舸傍江潯。嘔啞遠鷗音。新科持片玉。能政引孤琴。美進宮坊秩。榮歸里閭心。名參天下雋。歌著邑中黔。地志連香徑。家園帶武林。吳山幾屏秀。楚水一篙深。晚鼓停餘疊。秋帆臥半陰。平時接方驥。後夜望橫參。陶菊何妨醉。江毫且剩吟。悠悠河上別。千里鬱朋簪。

郡齋招子美

月色初藏桂。年芳漸有梅。人情欣臘破。天意許春回。陰雪迎風解。寒澌向日開。午杯宜試著。卯甕好嘗醅。高興題紅葉。乘閒步紫苔。長吟溪上曲。偏憶洛中才。絕墨凌崖石。高文拂斗魁。詩鋒無敢犯。酒戶少能陪。綠髮裁方鬢。丹心未肯灰。琴書聊偃仰。魚鳥暫徘徊。蔚豹雖藏霧。蟠螭已得雷。只愁騰踏去。相望隔蓬萊。

送晉陵王宰銓調

盤錯才無滯。弦歌政有聲。及瓜青紙詔。謁帝紫微城。節竝霜松峻。心同冰玉清。十槩行色貴。三府辟書榮。驛樹紛紅葉。江蘋老紫莖。祗應中宿路。雙節急歸程。

送祁陽黃宰

邑控三湘遠。帆經百舍遲。天文瞻翼軫。江色泛漣漪。丹闕傾心戀。蒼山舉目疑。歡杯憑秬米。騷思託蘭旗。竹律寬無害。琴堂靜不欺。期年行奉詔。虎帳對堯眉。

上客

上客何爲者。平生富義名。飛鈴師鬼谷。談笑敵神兵。然諾千金重。交游萬戶輕。平臺置酒召。碣館側身迎。士伍邀秦擊。銅盤劫楚盟。縱橫三寸舌。厭飫五侯鯖。龍種騰長坂。霜雕刮太清。誰能彈劍缺。北海有長鯨。

北海一作夷路

送黃推官

秀極武夷峰。清才氣所融。香名傳日下。勝範迪時中。大對承三道。清篇滯半通。新吟袖草綠。故事幕蓮紅。參畫文無害。沈英位未充。談高起廢疾。檄壯愈頭風。圭壁嚴書殿。房心敞帝宮。行頒上方筆。客特薦揚雄。

早秋

金商纔換暑。雲葉早驚秋。大火宵中散。清光日下浮。涼心遺翠簟。遠夢繞滄洲。蕙圖殘香薄。筠溪碧蔭稠。小牕聊寄傲。虛閣鎮端憂。帶眼渾移盡。還同沈隱侯。



